

四庫全書

史部

欽定四庫全書

欽定石峯堡紀畧卷十六

七月二十四日丁丑

上命軍機大臣傳諭阿桂福康安曰前據剛塔奏於打喇赤堡遇見賊匪正在擊剿間遊擊薩炳阿因帶石傷所領左哨兵丁先行退走等語曾降旨令李侍堯查明首先退走之兵正法示衆總未據李侍堯奏又前據馮光熊奏守備福泰等於白楊嶺遇見賊匪

被害亦已有旨令阿桂福康安查明遇賊時若止係福泰等在彼玉柱或往別處捕賊尚屬可原若玉柱亦在白楊嶺為賊衝退或竟躲避即當將該副將嚴叅治罪著再傳諭阿桂福康安即將玉柱貽誤之處迅速查叅如該員從前曾經出力亦著一併據實查奏候朕酌量降旨庶功過兩不相掩使帶兵員弁共知有所勸懲至遊擊薩炳阿帶有石傷左哨兵丁竟敢先行退走綠營怯懦殊堪痛恨即福泰等遇害時

雖所帶兵丁亦有傷亡者而其餘未經被傷各兵是否亦係先行退避均應逐一查明按法辦理從來行軍之道貴在紀律嚴明我

### 太祖

太宗開叛時凡遇用兵如有臨陣回顧者許在後之兵即行砍殺維時將士所以人人効命奮勇當前今石峯堡等處賊匪雖已蕩平各路官兵亦經議撤然兵可百年不用不可一日無備況兵丁見將領受傷理應

奮勇上前救護若兵不顧將先行退走此而不查明  
嚴辦將來地方遇有不逞緩急需兵或皆效尤退縮  
豈不至於債事著傳諭阿桂福康安即傳集薩炳阿  
勦賊時所領左哨兵丁並福泰等遇賊時所帶之兵  
令其將首先退潰之人據實舉出並諭以如不將首  
退之人舉出即將伊等全行治罪如此曉諭衆兵丁  
等共知畏罪互相指証必將首先退潰之人供出阿  
桂福康安即當一面奏聞一面將該兵丁按軍法辦

理以肅戎行不得以現在軍務已竣且法不及衆遂  
爾置之不辦

二十六日巳卯

上命軍機大臣傳諭阿桂福康安曰前據福康安查奏  
副都統明善於高廟山勦賊時乘勢追趕因未悉地  
勢誤中賊人之計且賊衆自上下撲官兵抵敵不住  
猶復力戰是以陣亡甚多尚非見敵怯懦自行潰散  
等語已有旨將明善交部議卹矣至明善所帶官兵

其陣亡者固應照例予卹其退回者豈可濫邀賞叙  
著傳諭阿桂福康安此次軍務告竣時所有明善帶  
領之各將弁退回者著概行扣除不得列入議叙兵  
丁亦不得加以賞賚以示懲儆

二十九日壬午福康安奏言查甘省乾隆四十六  
年臯蘭河州等處經撒拉爾逆回滋擾案內欽奉  
恩旨照乾隆三十年寧遠伏羌通渭地震之例從優撫  
卹凡有傷斃人口每大口給埋葬銀二兩小口七

錢五分燒燬房屋每間給銀二兩生存人口每口  
先給糧一倉斗初賑不論大小口給糧三倉斗再  
普行加賑一月每大口日給京升糧八合三勺小  
口四合一勺五抄倘有踐踏禾苗入於災傷案內  
分別辦理又務農之戶每戶賞給農具銀一兩被  
掠牲畜每牛馬騾一匹頭借給價銀四兩每驢一  
頭借銀二兩分作四年徵還又欽奉

諭旨將該三屬應徵該年額賦一體蠲免在案今此次



鹽茶通渭伏羌靖遠安定會寧靜寧隆德華亭秦  
州秦安莊浪各屬賊氛所過或焚掠村堡或攻擾  
城池雖被害輕重不等均有受其擾累之處除本  
年地丁錢糧業已欽奉

恩綸普行豁免外所有被難各戶傷斃人口燒燬房屋  
搶掠牲畜均應照四十六年之例從優撫卹至附  
近賊氛處所百姓聞風驚避遷徙流離殊堪憫惻  
自應仰體

皇仁照被難民人之例一體賑卹現在賊匪剿平所有  
續歸人戶亦應查明補賑再有田苗被賊蹂踐之  
區與偏受災傷無異請即勘明頃畝按照偏災之  
例分別辦理又靖遠伏羌靜寧等處均被賊攻圍  
旋經官兵擊退城內居民未受劫掠但當城門堵  
閉之時比戶驚惶不能自謀生計亦堪軫恤惟較  
之聞信驚避遷移流離者稍屬有間應請照被難  
民人加賑之例酌給八月分一月口糧以大口八

合三勺小口減半按月核給俾資餬口庶免向隅  
臣現在諄飭委查之員實心經理即以存貯軍糧  
就近按戶散給並責成該管道府覈實稽查務俾  
災黎均沾實惠仍飭藩司嚴行查察臣仍不時留  
心體訪抽查務期毋濫毋遺仰副

皇上惠恤窮黎有加靡已之至意奏入

上諭內閣曰前以甘省逆回滋擾百姓田廬牲畜被其  
剽掠及聞信驚避遷徙流離者均為可憫曾降旨令

福康安查明撫卹並將該省錢糧普行蠲免茲據福康安奏鹽茶等處各廳州縣所屬地方俱有賊氛經過其被難各戶人口及聞風驚避事後續歸並靖遠伏羌靜寧等處被賊攻圍比戶驚惶不能自謀生計均應酌量分別撫卹現在將存貯軍糧按戶散給等語甘省剿捕逆回各路官兵雲集所有需用軍糧自應多為籌備現在賊匪已殲擒淨盡官兵陸續撤回其餘剩軍糧若仍運回本處未免轉滋勞費自應即

於各該處就近散給被難戶口以資口食著福康安督飭該管道府覈實稽查務俾災黎均沾實惠該部知道

同日阿桂福康安奏言前奉

諭旨令馮光熊即將馬元一犯解赴軍營訊究該犯來歷及從賊確情臣等遵即飛飭馮光熊將馬元解赴軍營並飭安定縣將馬德一併解送據馮光熊詳稱前因安定縣拏獲匪犯馬德供有省城西關橋

門外回匪馬元馬達弟子二犯隨督率蘭州府臬  
蘭縣將馬元立即拏獲節次委員嚴審並親提訊  
究該犯前後供詞游移屢經嚴訊茹刑不吐雖據  
供出知情回犯何建瑞馬獸醫馬天沛三人及經  
拏到研訊俱極口稱冤隨令馬元質對該犯又復  
翻異且稱實係畏刑妄供并馬德亦不認識終無  
確實供詞其馬達弟子一犯訪查並無其人現將  
馬元委員解送聽候質審並據安定縣將馬德押

解前來臣等連日提集各犯隔別嚴鞫據馬元供  
我係河州本城回民本年三月間到蘭州城南馬  
有福羊店裡當火房從不曾認得馬德並沒有叫  
我入邪教的事復提訊馬德據供原籍河州回民  
於二十五年同堂兄馬三十一移住西寧丹噶爾  
地方賣飯生理到三十五年我就出門到馬營賣  
杏仁茶一二年也回家看一次這馬元我並不認  
識因審問時畏怕受刑隨口供扳今年五月初一

二日我在馬營聽得開脚店的馬一麻目并沙三說草茅溝張阿渾要上石峯堡造反初四日要搶馬營我聞言害怕想往丹噶爾堂兄那裡去初三日在馬營起身初四日住雙橋初五日到內官營被安定差役拏住送縣審問我熬刑不過信口妄供是實反復研鞫該犯等矢供如一除馬一麻目沙三二犯已飛飭該員迅速查拏解訊外查馬德一犯雖訊無糾夥從賊確據其供出馬元等俱係



畏刑誣扳但張文慶在石峯堡聚眾肆逆係五月初五之事而馬德於初二日即聞有此信是張文慶之謀逆該犯必屬知情應俟馬一麻目沙三二犯查拏到日歸案核辦其何建瑞馬獸醫馬天沛又係馬元信口供出今訊明委係無干其為馬德等畏刑妄扳似無疑義所有馬元何建瑞馬獸醫馬天沛均應即予省釋以免波累再馬守正供出之逸賊五十人臣等業經開單咨明五岱等務

期按名拏獲審訊正法毋使一人漏網嗣據五岱等咨報陸續勦殺擒獲賊匪共四十餘名訊據拏獲賊犯沙萬成等供稱賊匪自白楊嶺與官兵打仗之後即行分竄今又逃在大黑石山小黑石山西壁子山一帶深山藏匿尚有二三十人等語當即帶領官兵在大黑石山一帶加意搜捕寔力緝拿務期淨盡奏入

上命軍機大臣傳諭阿桂福康安曰據阿桂等奏馮光

熊將馬元馬德各犯解赴軍營詳細研鞫其中惟馬德一犯預聞張文慶肆逆之信應歸案核辦所有馬元等犯實係馬德畏刑誣扳即予省釋等語此等回民雖據伊等堅供平日並無與賊人往來之事阿桂等即行釋放仍宜嚴飭地方官不時留心覺察福康安係該省總督稽查奸匪是其專責斷不可稍存大意又據奏白楊嶺賊匪現逃往大黑石山一帶尚有二三十人五岱現帶兵加意搜捕等語白楊嶺賊人

業經馬守正供出姓名無難按名搜捕五岱帶兵在彼緝拏斷不可使一人漏網即使自斃亦應得有屍身方為足信

同日阿桂福康安又奏言查石峯堡附近民人董有於乾隆四十六年三月呈控回民馬正芳等修堡挖窖一案所有審斷之知縣趙元德業經於捏災冒賑案內正法該管知府宗開煌已發遣黑龍江鞏秦階道文德係濫行出結革職永不叙用現

已回旗應就近拏交熱河審明治罪至四十七年  
八月董有復行控告其時係通渭縣知縣王懷鞏  
昌府今調蘭州府知府張燮鞏秦階道張廷桂任  
內之事且張文慶馬四娃於草茅溝馬營起事亦  
係通渭縣所屬除王懷張廷桂已於另案革職拏  
問應將知府張燮革職拏問一併解赴熱河審明  
治罪至田五蓄謀圖逆已非一日而往來勾合逆  
蹟漸彰則始於本年正二月間前據已正法之鉄

匠馬明德李銀清等供稱本年正二月及三月二十間李自黨向說要同田五起事邀其入夥令打造軍器遂各打造矛子數十根送至李自黨家收存轉交田五是田五私造器械亦起於本年正月其時鹽茶廳同知百泰署鹽茶廳同知敦柱平涼府知府王立柱護平慶道永盛平慶道沈鳴臯各該員任內之事除百泰業經病故毋庸議外查敦柱永盛俱係暫署之員王立柱沈鳴臯均係本年

三月到任但於該犯謀逆情節漫無覺察非尋常失察可比應遵

旨革職拏問解赴熱河治罪臣福康安一面委員摘印

署理一面派員押解起程所有失察各員及專管

兼轄武職員弁俟臣等查明另摺參奏其固原州

知州失察回匪馬昇貴開挖地窖一案容臣等到

彼時詳悉履勘審訊明確再行核辦奏入

上諭內閣曰文德著就近拏交刑部審訊張燮敦柱王

立柱永盛沈鳴臯俱著革職拏問解京交部審明治罪

同日阿桂福康安又奏言竊照署靖遠協副將候

補叅將玉柱經前督

臣

李侍堯派令同副將八十

五帶領弁兵勦捕糜子灘鷹窩石等處賊匪嗣據

該副將稟稱勦除幾盡止有逸賊二十餘人當經

李侍堯飭交署副將玉柱就近搜捕令八十五帶

兵赴軍營嗣該處賊匪復聚集百餘人分竄白銀



廠西番窑黑砣塔井等處滋擾又經前督臣李侍

堯派委該署副將帶兵五百五十名前往搜捕該

署副將於六月初自靖遠帶兵起程在萱帽塔白

楊嶺鷹窩石一帶搜捕臣福康安抵石峯堡後即

添派兵丁前往屢經嚴飭該署副將上緊搜拏乃

該署副將既不能確探賊踪迅往勦殺又不能設

法繞截擒拏徒事尾追空勞兵力在彼二十餘日

並未擒獲一賊臣福康安因該署副將辦理此事

未能妥協又添派兵丁一千名令延綏鎮總兵策卜坦前往寔力查拏嗣復遵

旨派五岱選派弁兵迅赴該處督辦賊匪久已竄入深山四散藏匿雖經陸續拏獲正法數十名尚未搜勦淨盡皆由該署副將不能及早查拏所致請將署靖遠協副將候補叅將玉柱革職拏問交刑部治罪副將八十五前次勦捕鷹窩石賊匪未能悉數殲除應請一併革職至延綏鎮總兵策卜坦並

不督率將備寔力搜拏第分派弁兵四處偵探伊  
竟安坐靖遠遷延觀望咎寔難辭應請

旨交部嚴加議處奏入

上諭內閣曰署副將玉柱帶兵搜捕賊匪即當偵探踪  
跡實力查拏乃竟徒事尾追並不上緊搜捕以致賊  
人得竄入深山不能立時勦捕淨盡罪實難辭玉柱  
著革職拏問交刑部治罪八十五搜捕賊匪不能悉  
數殲除亦著革職至策卜坦為總兵大員乃並不督

率將備親身前赴各該處妥速勦辦竟安坐靖遠遷延觀望並著一併革職拏問交刑部治罪

同日阿桂福康安又奏言查石峯堡底店兩處回犯家口及被掠婦女幼孩除首惡張文慶馬四娃及楊填四等名下男婦大小并馬文熹之子孫族屬男口業經查明全行正法又節據看守員并具報病斃各犯外計石峯堡婦女幼孩共一千六百餘名口底店婦女幼孩共二千五百餘名口臣等

前於辦理底店完竣即將該二處回犯眷口逐一清查遵

旨分賞侍衛章京滿洲官兵及四川官弁屯練降番共婦女幼孩一千九百餘名仍飭帶兵大員沿途嚴密稽查管束毋令遺失脫逃及於甘省地方私行售賣致滋事端因人數衆多未能全數分賞所有餘存人口現俱押送靜寧州暫行羈管此外尚有各州縣陸續拏獲逆回家眷五百餘名口俱就近

監禁通計男婦幼孩尚共有二千六百餘名口本省官兵自不應分散撥給若仍發往新疆地方長途解送未免勞煩臣等公同酌議擬將此項回犯家口分發回民較少之江寧浙江福建廣東四省給與駐防兵丁為奴俟查辦清楚即派員分起押解前往奏入報

聞

同日福康安又奏言竊照逆回不法荷蒙

皇上飭派八旗勁旅先後來甘並節經

奏調陝甘滿漢官兵暨阿拉善蒙古四川將軍提鎮  
官兵屯練降番及甘省土司老教土兵雲集進剿

仰賴

天威

睿算業將醜類殲除當軍務伊始之時即奉有

恩旨別處徵調兵丁應得鹽菜口糧必須隨時寬為應  
付即甘肅本省及陝省調到各兵亦不必拘泥成例





需緊要未便拘泥候公但事關例外支銷自應據實

奏明仰懇

皇上交部存案以便將來造冊報銷臣謹按款臚陳仰祈

聖鑒

一此次軍需糧草先儘就近各州縣倉廩撥供間有因存貯不敷隨時採買撥運者其支運過數目

不難按冊稽查自應分別動存各數據實造銷至  
軍需動缺糧石俟飭藩司查明各屬倉貯情形另  
案奏請補買

一各處官兵追剿賊匪因營盤不時移動即駐劄  
處所多無柴薪兵丁不能炊爨必須裹帶餽餉炒  
麪以資接濟其麪斤輕重及運送脚價本有定例  
應支數目可以核定分別造銷惟前項匠工煤火  
從前未經辦過此次自應核實報銷

一甘省山路崎嶇粮草均係騾驢馱載嗣因牲口  
缺少雇覓民夫背運甘省向無成例該司稟請每  
名每日給銀六分口粮一升查金川軍需案內本  
有雇覓背夫之例口內每夫每日給銀一錢今較  
核無浮將來再行核實報銷

一阿拉善赴調兵丁並未帶有軍械火藥均由綠  
營撥給除事竣移令交還外其遺失及用去數目  
再行核實報銷

一此次賊人困守石峯堡官兵用大砲轟擊添鑄  
砲子並挑挖壕塹打造鋤鋤雇用人夫所有鉄斤  
夫匠工價均請核實報銷

一各驛調缺馬匹前因河東河西衝途州縣均有  
遞送文報差務紛繁彼時軍需之際尤關緊要若  
竟撥缺不補則支差不敷必致貽悞是以准令採  
買補額應請核實造銷

一此次官兵打仗分路撲滅深入賊巢追逐無定

軍營需用帳房多由地方官隨時製辦運用其價值匠工及運送騾腳等項應准據實造銷

一此次賊匪起自鹽茶竄入靜遠安定會寧通渭伏羌隆德靜寧秦州秦安華亭莊浪等處皆被滋擾雖經調集各路官兵剿捕但派調之兵除追剿外其分撥守禦已屬無多且亦不能處處派兵防護彼時賊勢猖獗城池倉庫關係重大不惟賊到之處勢不得不雇用民夫協同防守即附近賊氛

之固原臯蘭平番金縣隴西西和寧遠漳縣狄道  
渭源岷縣洮州禮縣崇信紅水縣丞沙泥州判平  
涼縣又回民較多之西寧碾伯河州等處賊踪出  
沒無定不得不雇民夫以資堵禦據各屬詳報雇  
覓民夫八九百名至二三千名不等甚有多至五  
六千名者但查乾隆四十六年辦理撒拉爾軍需  
案內臯蘭等十四廳州縣供支雇覓防守城隘民  
夫現奉部駁尚未准銷此次亦應分別情形酌定

限制以杜浮冒查回匪攻擾之處防守民夫應每日酌給錢八十文其附近州縣雇覓民夫每名每日酌給錢六十文至燈油棉花等項一概不准開銷其雇覓民夫數目凡賊到地方應請大州縣不得過二千名小州縣不得過一千名其附近地方需雇夫防守者大州縣不得過一千名小州縣不得過三百名令其核實造銷

一上屆剿捕撒拉爾逆回案內本省及陝省派調

兵丁應得鹽菜銀兩准開銷十分之八及十分之六此次奉有

恩旨甘肅本省及陝省調到各兵應得鹽菜不必拘泥成例支給是以照別省兵丁之例一體全支應請據實報銷

一此次征勦回匪除圍困石峯堡時已有定地與前次征勦撒拉爾逆回在華林山情形相同照例分別三百里內外核給口糧其從前跟踪尾追及



派往各處搜捕賊人逃竄並無定地追勦官兵亦無定所兼之甘省山路崎嶇官兵四路追趕日無寧息且深入空山距市集甚遠鄉民潛逃無從買食即在三百里以內者勢不能不裹帶前往正與前奉部議准借裹帶之例符合應一體支給口糧作正開銷以上各條均係實在動用之項特因格於成例恐碍報銷惟有據實陳明以便將來核實造報奏入

上諭該部知之

福康安又奏言甘省平番縣屬之連城紅山並碾伯縣各土司地方乾隆四十三年夏秋被災土民拮据經前督臣勒爾謹

奏准借給籽種口糧銀兩以資接濟查連城土司原借銀一萬二千二百四十五兩紅山土司原借銀一千六百一十兩碾伯土司原借銀二千五百二兩零原議自乾隆四十四年麥熟後分作三年徵

還至四十五年欽奉

恩詔偏災地方借給貧民籽種口糧銀糧查明實係力不能完者著予豁免隨將各土司未完銀兩統入各屬請免籽種口糧銀糧內彙案聲請接准部覆以土民所借籽種口糧折色銀兩係奏准三年徵還尚在分限以內非實係力不能完以致拖欠者可比未便概予豁免應仍照奏明年限按數催徵完報在案嗣於四十七年欽奉

諭旨將甘省四十六年以前民借籽種口糧銀糧全行  
豁免因各該土民前奉部議不准蠲免是以亦未  
造入免冊查前項原借銀兩除歷年徵完外尚該  
未完銀九千四百七十兩二錢九厘內連城土民  
欠銀七千五百八十八兩三分三厘紅山土民欠  
銀一千三百四十三兩八錢三分四厘張伯土民  
欠銀五百三十八兩三錢四分二厘實係無力土  
民不能完納之項自應勒令催徵但各該土司等

向化日久該土民雖由土司管轄奉有調遣靡不  
踴躍爭先實與內地兵民無異即如四十六年撒  
拉爾回匪肆逆各該土司率領土兵隨同進剿奮  
勇殺賊宣力戎行曾奉

特旨將連城土司魯璠等分別加恩以示獎勵此次鹽  
茶廳等處逆回滋事又調各該土兵隨營進剿並  
派往各處防守城池亦俱奮勉出力查軍營調集  
之川省屯練土兵曾蒙

恩賞給兩月錢糧本省撒拉爾老教土兵亦奉

旨優給口糧鹽菜即未經被賊滋擾各地方因有輓運  
事宜不無藉資民力欽奉

恩旨將通省本年額徵錢糧概予豁免惟各該土民因  
並無歲輸正供不能一體仰沐

恩膏未免向隅仰懇

皇上特降諭旨將連城紅山碾伯各該土民所有未完  
籽種口糧銀九千四百七十兩零概行豁免則

恩施淪浹各該土民莫不歡欣鼓舞感戴

皇仁於靡既矣奏入

上諭內閣曰據福康安奏甘省平番縣屬之連城紅山並碾伯縣各土司地方於乾隆四十三年借給籽種口糧未完銀九千四百七十兩二錢零請旨豁免等語各該土民由土司管轄奉公調遣與編氓無異此次逆回滋事該土兵等或派隨營勦賊或派防守城池無不奮勉出力著加恩將連城紅山並碾伯縣各

土民前欠籽種口糧銀九千四百七十兩二錢零一併豁免該部知道

同日福康安又奏言查甘肅藩司辦理新疆經費一切支銷造報事務叢雜本較他省為繁況值軍興以來辦運馬匹糧草輓運軍火器械事事皆其專責非精明強幹之員弗克勝任浦霖由戶部司員出身前在湖北安襄鄖道任內經劉秉恬等奏懇發往四川辦理軍需奏銷最為熟諳現在軍務



告竣所有支發款項正須造冊報銷全仗該司一人承辦難以更易生手至陳步瀛人亦明白誠實在軍營督催糧運甚為出力其從前往來隆德靜寧察看賊匪籌辦堵禦情形誠如

聖諭頗具識見能事可嘉但才具不如浦霖合無仰懇聖恩俯准仍以浦霖調補甘肅布政使陳步瀛即補安徽布政使一轉移間人地實屬相宜而臣亦得資佐理之益奏入

上諭如所請行

三十日癸未

上諭內閣曰李侍堯身為總督到甘數年於回民修堡謀逆毫無聞見非從前撒拉爾之變起倉猝者可比迨賊匪四出奔竄復逗留靖遠安定其於此事始終貽誤罪實難辭伊係曾經獲罪之人朕加恩寬宥仍用為總督原令其倍加整頓以贖前愆乃竟因循債事朕實引以為愧此案經留京王大臣及大學士九

卿科道等會議擬以斬決復命隨從之王大臣等覆核照議本應依擬即行正法但念地方因有不逞之徒滋事擾害致本省總督即罹典刑轉恐啟刁風而滋厲階非所以遏寇虐靖邊疆也從前蘇四十三滋事時將勒爾謹革職拏問經廷臣核擬斬決彼時亦曾加恩改為監候後因該省折收監糧案發是以賜令自盡原不因蘇四十三之事今李侍堯玩愒因循其罪雖浮於勒爾謹但念其歷任總督多年於地方

事務尚屬諳練通曉至於軍旅本非其所嫻此次若因逆回蠢動誅及總督轉非綏靖地方之道李侍堯著從寬改為應斬監候秋後處決令其覲坐囹圄自思罪戾至剛塔本係武夫有勇無謀甫到固原提督之任即值逆回起事不能先期覺察及賊人竄聚馬家堡時剛塔在山前扎營不思設法堵截後路致墮賊計追賊已潛逃又不能繞出邀截惟知在後尾追予以重辟亦屬罪所應得但究係甫經到任未悉地

利其勦賊時各路官兵尚未到齊伊所帶之兵不過數百名尚能殲斃賊首田五并於馬泉灣殺獲賊人家口牲畜且身受箭傷核其情罪尚可量從末減剛塔著免其死罪發往伊犁効力贖罪以觀後効朕辦理庶獄一秉大公凡臣工功罪惟視其人之自取不使一毫畸輕畸重所有辦理此案緣由明晰宣諭中外咸使聞知

臣等謹案帝王刑罰之公與天下共之李侍堯

身膺封疆重寄在甘數年乃於回匪蓄謀糾逆  
毫無覺察以致貽患養奸逮賊匪蠢動披猖復  
逗留不進貽誤機宜

皇上節次降旨

命大臣等詳晰定讞爰書既上復明頒

訓諭以平日尚屬能事軍旅本非素嫻且因逆回滋擾  
誅及督臣於綏靖邊方之道轉有未協

特從寬典改為監候俾自思咎戾至剛塔帶兵勦捕徒

事尾追賊人得以潛逃接應而其殲斃賊首奮  
勉受傷功雖不足抵罪尚堪量為末減並加

恩賞予以發遣自効

聖天子勅法明刑權衡至當絕無畸輕畸重於其間是  
以天下臣民靡不同深感服也

欽定石峯堡紀畧卷十六

欽定四庫全書

史部  
欽定石峯堡紀畧卷十七

中書臣張經田覆勘

總校官檢討臣何思鈞



欽定四庫全書

欽定石峯堡紀畧卷十七

八月初五日戊子

上命軍機大臣傳諭阿桂曰前據阿桂等奏親赴固原  
查勘馬昇貴挖窖等事想此時自當查辦完竣其善  
後各事宜諒亦已與福康安妥協商辦此外即有零  
星之賊如鷹窩右等處自己殲擒淨盡設有一二遁  
逃者福康安在彼督同將弁等實力搜捕無難按名

弋獲現在已屆秋錄阿桂總理刑部事務着傳諭阿桂接奉此旨即起程回京辦理勾到事宜

初六日己丑阿桂福康安奏言查現在賊匪殲滅回情猶未免驚疑臣等屢出示曉諭漸就寧帖至蘭州河州回民自賊匪起事以來安靜守法實無被賊勾合從逆之人無可查辦是以臣等未經帶兵前往止于各路官兵撤回之便派將軍提鎮大員前往賊匪起事及經過處所會同地方官實力

搜捕餘匪務期淨盡並囑其妥為辦理茲據成都將軍保寧等咨稱帶兵前往馬營通渭伏羗一帶所屬回民在道旁迎謁者甚多體察情形甚為寧帖詢之該地方官據稱實無藏匿餘匪並據各庄回民鄉約等僉稱附近回民原有私自從賊潛行逃回者均經官兵陸續拏獲及本庄拏解送官大小男婦共七百餘名現在實無餘黨情愿各具甘結又與總兵富祿袁敏分路親往山溝窰洞遍加

搜查實無一賊未便徒費兵力虛糜口糧已同袁  
敏帶兵取道秦州一路回川令富祿帶兵取道秦  
安由隴鳳一帶回營等因是通渭伏羌所屬可信  
已無餘孽至安定所管官川地方最為逆回勾結  
滋事之處臣福康安於攻得底店山梁後恐該處  
及馬家堡一帶竄匿賊匪隨經

奏明派領隊大臣噶塔布侍衛永福叅將阿穆呼朗  
等帶兵前往分捕嗣據噶塔布等報稱所有竄匿

賊匪除拏獲數十名即行辦理外其赴軍前投順者共一百七十餘名當傳各該庄鄉約及伊等親戚保領安插訖臣等以噶塔布等所辦殊屬冒昧不知事理輕重因即撤回令其前往伊犁于勦辦石峯堡賊匪後另委原任騰越鎮總兵許世亨副將富森帶兵數百名前往會同該縣陳善儀妥辦務將噶塔布等准投取保之逆回一百七十餘人盡數拘拏嗣據該鎮等稟稱所有逆回一百七十

四名據原保之鄉約人等或帶同交明兵役或報信密往擒拏俱已盡數拘獲並無一人漏網已解交安定縣監禁辦理等因伏思官川等處曾經從逆回民明知被獲即應正法不敢先行逃避原保人等皆其至戚不敢畧為隱藏且據各地方文武稟報有回民馬得周首出伊子馬連舉姪馬良臣馬良得又蘇德首出伊婿馬彥又黃進章首出伊甥吳進寶似此守分畏法皆由此次痛加殲戮之

後無不共知懲創現將各處解到賊衆嚴加審訊  
除馬得周一犯將伊子侄首出自應免其緣坐外  
如有供出匪徒即陸續拘拏治罪現在各省官兵  
及駐防滿兵俱已撤回惟本省綠營兵丁尚未盡  
撤回鷹窩石賊匪搜捕淨盡後即將所有官兵盡  
數撤回原營

阿桂福康安又奏言查此次石峯堡拏獲正法人  
犯一千四百餘名底店先後交出正法人犯一千

六百二十一名李侍堯等拏獲正法賊犯四百七十六名又底店打伏殺賊三百四十餘名石峰堡打仗前後殺賊一千七百餘名各處搜山官兵拏獲賊匪當即正法者一千餘名又前經五岱李侍堯剛塔等于靖遠伏羌通渭雲霧山鷹窩石狼山打喇赤等處打仗殺賊一千四百五十餘名又陸續擒獲賊回即于軍營正法者四百九十七名通計節次拏獲正法及打仗殺死賊回共八千餘名



又李侍堯剛塔等殲戮逆回婦女一千餘名此外  
尚有各州縣拏獲正法並現在監禁候訊應行正  
法人犯一千餘名至各州縣被害百姓並陣亡兵  
丁為數無多臣等現飭該州縣營員等詳查確數  
續行具奏均奏入

上命軍機大臣傳諭阿桂福康安曰據阿桂等奏蘭州  
河州回民自賊匪起事以來安靜守法實無被賊勾  
合從逆之人無可查辦等語覽奏畧慰亦祇可如此

辦理至馬得周等將伊子姪親戚從逆之處據實稟  
首此等守分畏法之民亦宜酌量獎賞又據奏石峯  
堡底店靖遠通渭等處勦殺賊衆及各處搜獲正法  
者前後共八千餘名戮戮逆回婦女一千餘名現在  
監禁俟審明辦理者一千餘名等語人數已及萬餘  
朕心實有不忍然皆賊犯等自取亦刳數使然也至  
各處村庄被賊搶掠受害百姓究有若干官兵節次  
打仗陣亡者究有若干並著查明據實覆奏又聞賊

犯楊世祿供稱因犯了竊案收在監裏五月十一日  
衙役王福士把我提出叫我走開我走到城門上被  
張阿渾裏到石峯堡入夥等語楊世祿係犯竊監禁  
匪徒衙役王福士竟敢私行放出致有從賊之事其  
藐法縱賊究係何故斷難姑容着傳諭福康安即將  
王福士一犯嚴審治罪至田五李可魁首先糾衆謀  
逆擾害地方雖該犯業經殲斃其家屬亦已緣坐但  
該二犯屍身阿桂福康安曾否親自驗明將伊判骨

揚灰即田五李可魁及張文慶馬四娃等祖父坟墓亦應剗挖起出屍身一併揚灰以為叛逆者戒阿桂福康安曾否辯及此事並著遇便覆奏至拏獲各犯供出之馬成傑黃保黃廷成黃殿四絞娃子楊仲昌吳興成李銀清田養梅吳應桂等各犯現在曾否按名拏獲並着福康安飭屬選派妥幹員役務將各犯全數弋獲辦理毋致漏網

同日阿桂福康安又奏言臣等自勦滅石峯堡逆回

完竣後於各路官兵撤回之便派將軍提鎮大員  
前往賊匪起事及經過各該處會同地方官實力  
搜捕如有形迹可疑者即加殲戮以期淨絕根株  
至賊營內窘迫投出及派往各路搜捕之鎮將弁  
兵擒拏解送各該州縣守卡夫役陸續盤獲又村  
民擒縛送官賊匪共數千名除已經正法外其分  
寄各州縣監禁者自數十名至百餘名不等伏思  
此項賊匪自應審明即正刑誅且可嚴訊黨羽查

拏究辦因靜寧州係各州縣適中之地臣等于底店從逆回民辦竣後即移駐該處一面飛飭安定會寧隆德伏羌通渭靖遠固原鹽茶廳秦安華亭平涼各該州縣及莊浪縣丞將前後拏獲監禁各犯選派兵役迅速押解前來詳細嚴究茲據各州縣解送臣等遂加研訊或聽從糾紛入夥或賊匪經過隨行俱各供認為賊打仗役使實情不諱詰其平日有無同謀勾合之人則僉供實係被賊逼

脅或先將家口裹去或以刃矛恐嚇一時無奈順  
從並非預謀黨羽等語臣等查此內有馬廷芳等  
五名尚應暫留候質至吳進寶等四十九名俱係  
入夥從逆又應行緣坐犯屬十三名理應卽正顯  
戮臣等于審明後卽派涼州鎮總兵蘇靈陞任按  
察使陳步瀛監視按名正法訖餘俟各州縣解到  
時陸續審辦再馬壯供出修理石峰堡之大馬家  
馬正芳華陽窪馬廷秀二犯臣等先經派員前

往迅速查拏嗣據稟報該二處村庄逼近石峯堡  
該處回民大小男婦全行從賊上堡現在並無一  
人隨向拏獲監禁各犯內有該二處回民逐細跟  
究據馬友供稱親見馬正芳馬廷秀于七月初四  
日投出被官兵拏去正法等語臣等檢查是日正  
法各犯名單有該二犯姓名在內其為投出伏法  
已無疑義又田友供出之黃鬍子阿渾哈得成田  
養和田養順馬仗有馬自成六犯查黃鬍子阿渾



籍隸靈州臣等飛飭查拏嗣據該署州洪彬稟報  
靈州回民並無黃姓止有王成仁從前係新教阿  
渾于乾隆四十六年當官具結改從舊教本年田  
五起事即奉按察使行文將該犯拏送皋蘭縣監  
禁等因臣等現在飭提該犯嚴審究辦至哈得成  
馬伏有二犯俱經前督臣李侍堯拏獲正法田養  
和田養順二犯現在訊據田養梅供稱俱隨田五起  
事田養和在糜子灘落河身死田養順在狼山打

仗被官兵殺死馬自成已據鹽茶廳稟報拏獲俟  
解到審辦至張文慶之子張太掌教張樂雖據張  
文慶供稱初二三等日下山偷水被官兵殺死尚  
難憑信臣等仍嚴飭查拏茲據伏羲縣知縣楊芳  
燦稟報將張太拏獲訊係初四日夜間竄出俟解  
到時嚴加跟究張樂及張文慶所供伊戚馬廷海  
實在下落至差役張金與張文慶同族回民透露  
消息知情縱逆寔屬不法臣等現已拏獲審訊該犯堅

供並未告知張文慶有去無來之語顯因質証無人  
狡供不吐俟張太解到即可質對明確一併辦理  
其馬四娃之兄馬三娃及應行緣坐親屬臣福  
康安前經密扎西寧府知府巴海親往查拏辦理  
茲據該府稟報查明馬四娃本係回民蘇大朋之  
子兄弟共有六人長名蘇旺福即沙必里次名蘇  
旺才即色英蘇三名蘇旺成係充當剿課營兵丁  
於四十四年八月內攜眷赴伊犁屯田四即該犯

五名海木賽六名乙的里該犯七歲時過繼與同  
民馬良賓為子尚未成婚於乾隆四十一年正月  
出外學習經典迄今九載從未回家現已設法將該  
犯繼父馬良賓胞兄沙必里色英蘇胞弟海木  
賽乙的里逐一擒拏到案隔別研訊供俱相符等  
因臣等伏查馬四娃罪大惡極其本宗親兄弟及  
繼父繼父之子俱律應緣坐當即飭該府將拏獲  
各犯及婦女幼孩多派兵役迅速解至靜寧以便

審辦並查明喇課營兵丁蘇旺成是否攜眷赴伊犁屯田即行文該處將軍一併拏獲解送辦理

阿桂福康安又奏言臣等接奉

諭旨逆回滋事地方空出房屋田地例應入官變價未便仍令回民承買執業居住著招令甘省漢民分戶認買移居如尚有餘剩房屋可令附近甘省之陝省民人出賃認買庶可使此等地方皆為漢民居住較易彈壓等因欽此查逆回起事及從逆黨羽如小山

海城底店石峯堡馬營官川草芽溝老鴉溝蔡家  
堡烏家坪朱家河大馬家庄白馬庄馬家堡糜子  
灘鷹窩石各等處所有勦洗回民空出房屋田畝  
應入官變價者自不得復令新舊教回民承買執  
業臣福康安現已派員分往各該處將空出房屋  
詳悉查點遺存田畝逐一丈量俟有細數清冊即  
出示曉諭招令甘省漢民分戶移居至甘省地瘠  
民貧仰蒙

聖明洞鑒多方體卹令少為估價貧民圖利自必踴躍  
爭先臣等又思當逆匪滋擾時賊踪所過地方民  
人廬舍被燒牲畜被掠以及聞風躲避遷徙流離  
最為可憫現已仰體

聖慈加意撫恤俾免失所而瘡痍之後元氣究難驟復  
所有逆回空出房屋田地自應先儘被難漢民認  
買再及別處居民如甘省民人承認之外尚有餘  
剩房屋即遵

旨令附近甘省之陝省民人出貲認買但被難貧民日  
給不敷諒無餘貲交官還值又當酌量變通官等  
擬擇其誠實可信者令分戶認買仍准將所估  
價值分年攤交則官項不至虛懸而身家藉貲贖  
給似亦推廣

皇仁加惠災黎之一法至此外民人承買如不能一時  
交清價值者亦准其分年帶交應與難民稍示區  
別俟招買時臣福康安再行酌定辦理均奏入報



聞

初十日癸巳阿桂福康安奏言據五岱等咨報連日分派官兵逐處搜捕在劉家庄活拏賊匪馬守高馬望二名又于糜子灘拏獲哈利不等八名又據兵丁在沿河一帶撈獲賊屍一軀搜殺賊回四名隨令糜子灘百姓細加驗認俱稱委係該處回匪又據五岱咨稱該處竄匿餘匪先後拏獲五十餘名訊據獲犯供稱止有八人分投藏躲未知下

落等語臣等伏思以數名賊匪留駐多兵饋運糧餉既滋煩費且該處深山密洞甚多一時難以遍加踪跡賊匪等畏避躲藏或自行餓斃而多兵坐守曠日持久亦屬不成事體因公同商酌令五岱等所帶兵丁即行撤回其有應由該處順道回至原營者即令該將弁帶領就近各回本汛所有未獲逸匪數名見官兵既撤或潛出覓食或希圖逃竄附近百姓轉可隨時擒縛不致漏網仍嚴飭該

管地方文武官弁差派兵役留心偵緝實力查拏  
毋少疎懈並曉諭該處鄉約居民令其協同緝捕  
如有潛出回匪即行縛獻再查小山海城馬營官  
川草芽溝等處情形與底店不同底店回民先經  
從逆攻打城池焚搶村庄傷害百姓後見官兵勢  
盛始行歸正是以于石峯堡勦賊完竣後以次辦  
理至田五所居之小山張文慶所居之草芽溝兩  
處回民數十戶俱係挈家從逆業經勦洗淨盡海

城即鹽茶廳駐劄之地城內回民八十餘戶有新  
教從逆五家于田五起事時經舊教回民首出拏  
獲正法家屬緣坐其餘俱係安靜知法良回幫同  
守城出力馬營係通渭所屬乃舊時縣治尚存衙  
署倉庫城內漢民千餘戶回民不過數十家該處  
距草芽溝僅數里賊匪起事被其荼毒尤甚居民  
房屋燒燬十之六七回民屋廬同被焚劫現在查  
明一體撫卹其安定所屬之官川回民從逆入夥

者甚多均經勦洗現存安分守法者更加畏懼惟  
恐波累凡自賊營竄回餘匪或擒縛解送或報官  
指拏甚為出力是此數處均無可查辦至賊匪空  
出田地房屋例應入官變價者臣等分別籌辦委  
員查丈茲據稟稱賊匪多居窑洞即有房屋該犯  
攜眷從賊時或自行焚燒或被居民拆毀洩忿  
現在止剩土牆並無苫蓋其田畝亦零星錯雜難保  
無居民影射侵佔情弊須會同地方官攜取魚鱗細

冊逐一丈量方得清釐等因俟查勘明晰再行酌量估價辦理均奏入報

聞

同日阿桂福康安又奏言臣等飭令陞任臬司陳步瀛將靖遠縣禮拜寺是否係舊有未毀抑係毀後重建並將建造年月及現在曾否拆去之處詳細查明據實稟覆茲據該司詳稱甘省禮拜寺于乾隆四十六年十一月經前督臣李侍堯檄飭

各屬查明所管地方如有新教禮拜寺即行拆毀  
當經前署靖遠縣知縣吳廷芳查明該縣地方並  
無建蓋新教禮拜寺申覆在案今覆查該縣禮拜  
寺建自康熙五十八年實係舊有並非毀後重建  
本年五月初十日前督臣李侍堯駐劄該縣已令  
兵民人等將該處禮拜寺拆毀無存等語臣等查  
回民建蓋禮拜寺持齋念經由來已久且所在皆  
有勢不能驟行拆毀是以四十六年查辦時止令將

新教所建之禮拜寺盡行拆去但甘省回民信從  
新教者甚多于查禁嚴緊時無不改稱舊教而陽  
奉陰違一時無從究辦至不法之徒藉稱禮拜為  
名聚集寺中作奸犯科商同謀匪該管地方官自  
應隨時稽察實力查辦今靜遠縣禮拜寺雖係建  
立多年並非新教回民私行蓋造但賊回哈得成胆  
敢邀聚新教齊集寺中糾合從逆而該管官漫無  
聞見實非尋常失察可比除李侍堯業已拏問



蘭州府知府張燮另案革職拏問外應請

旨將靖遠縣知縣黃家駒革職蘭州道宋維琦交部嚴  
加議處以為玩視地方者戒至此次逆回勾結地  
方除靖遠縣哈得成等禮拜寺業經拆毀又糜子  
灘禮拜寺亦經五岱令兵丁拆去此外如馬營底  
店等處回民俱經從賊現已委員將所有禮拜寺  
一併拆毀臣福康安仍通飭各屬于所管地方實  
力查察並曉諭回民鄉約等遇有匪徒聚集寺中

謀為詭秘隨時稟報拘拏以期地方得臻寧謐奏  
入

上諭內閣曰此案黃家駒著革職宋維琦著交部嚴加  
議處

十六日己亥

上命軍機大臣傳諭福康安曰連日將甘省解到送回  
詳加審訊據馬四娃供馬明心于四十六年正法後  
我聽得河州有他幾個徒弟伏羗也有他徒弟當時

有被官兵殺死的有拏到蘭州正法的他們名姓我實在不知道等語馬明心係新教魁首其黨羽必當按名拏辦雖據馬四娃供業被官兵殲斃并拏獲正法究未足信著傳諭福康安留心細訪河州伏羗二處馬明心徒弟係何姓名共有幾人從前作何辦理詳悉具奏又據馬文燾供搶掠通邊鎮時那鎮上有我相好的人叫薛岱我怕衆人去害他就做一面白旗插在薛岱家門首不許衆人進去擄掠等語賊犯

搶掠通邊鎮薛岱因與馬文燾相好未經被害雖據供因係從前向借銀錢薛岱不要利息該犯感其小惠故以此相報現在自不便又事波累但此等與賊相好之人福康安仍宜嚴飭地方官隨時留心防範勿致滋事為要再前據剛塔奏賊匪于馬家堡潛遁後五月初四日在馬泉灣馬三阿渾馬如龍家吃畢茶飯即上尖山項札營等語馬三阿渾馬如龍二犯家屬雖當經剛塔搜獲其本犯下落未經究明又前

據五岱等奏官兵在雲霧山打仗時擒獲賊目馬玉華一名當經諭令將該犯解赴熱河審訊嗣後並未據五岱等奏明將馬玉華如何辦理並著福康安即查明馬三阿渾馬如龍二犯曾否拏獲正法如尚未就獲務督飭文武員弁上緊緝拏嚴辦其馬玉華一犯作何辦理亦著一併查明覆奏

同日阿桂福康安奏言臣等前奉

諭旨底店石峯堡地勢險要賊匪洗淨後自應酌駐官

兵或于底店設都司一員石峯堡設遊擊一員督率稽查等因欽此查石峯堡本無房屋可居底店地近隆德均可毋庸駐兵至陝甘二省於乾隆四十六年仰蒙

訓諭以邊陲重地捍衛宜嚴特令臣阿桂會同前督臣李侍堯酌議添兵共添實兵一萬二千七百餘名合之舊存兵額約有八萬列鎮分營兵力不為不厚惟是甘省幅輦遼廓地廣人稀而自涇州至省

一千餘里北控邊城南通隴蜀兼以崇山峻嶺重  
複迴繞外則番族環居內則民回錯處防禦不可  
不周雖將提督移駐固原以為東路襟喉其衝衢  
大路尚覺汎少兵車似應于安定會寧一帶添兵  
設營協以壯聲勢但該處向無井泉民居俱飲窖  
水設遇天時亢旱尚須遷避他處難以添駐多兵  
臣等公同商酌惟通渭所屬之馬營為舊時縣治  
居民共有千餘戶距石峯堡止五十里南達通渭

伏羗壯連會寧安定乃適中之地擬于該處添設一營多駐兵丁俾資控制彈壓又六盤山最為險要應于隆德酌添兵營并于山頂安設一汛責以稽查巡緝至東路各州縣如通渭伏羗定遠等處向俱無兵通渭于四十七年始議添兵十五名于事無益現在詳查通省有似此者俱擬酌添弁兵俾平時可備差捺有事籍資防守又汎兵有查察匪類之責今自涇州至省數十里始有一汛其勢



甚孤自應一體酌添不但地當孔道墩戍宜稠即  
深山峻嶺如馬家堡石峯堡底店等處俱應設汛  
撥兵務俾聲勢聯絡呼應可通並常令會哨週巡  
則奸宄不至潛藏而匪徒亦易緝獲但臣阿桂往  
來甘肅多次究未周歷臣福康安初任陝甘總督  
亦未能深悉情形且提督閔正祥總兵蘇靈皆甫  
經到甘畧當阿吉蘭太雖在任稍久于通省地方  
亦不能周知如蒙

俞允臣福康安再行詳悉確查通盤籌畫將應添營汛  
兵數分晰妥議會同該提督等具

奏至逆回田五張文慶馬四娃等于蘇四十三甫經  
勦除之後愍不畏死又復謀興新教勾結煽誘蟻  
聚鴟張現俱身膺寸磔閤門族屬駢首就誅其附  
逆惡黨及脅從被誘之人無不共罹大辟殲戮幾  
及萬餘村落為墟妻子遷徙回民見此情形心胆  
俱裂即素稱愛護同類而至禍患切身各思自保

性命凡有竄回餘匪不但親戚朋友擒拿首告且  
有父首其子翁首其壻者感懼媿悔之情已可概  
見是回民經此大加懲創似可望其畏法守分不  
致再滋事端至回民中選老成謹厚者充當鄉約  
令其查察匪類隨時舉報乃四十六年原定善後  
條款如此次田五訂期起事即係舊教鄉約李應  
得等首先呈告得以及早擒拏而各處竄匿餘匪  
多有經鄉約擒送報官者已有明效地方官果能

實力辦理原可要之以久不在多立章程摠之有  
治人無治法臣等受

恩深重荷蒙

委任籌辦善後事宜亦止添汛安營于邊疆重地稍為  
有裨斷不敢以補救空言臚陳塞責臣福康安身  
任總督責成尤重惟有督率所屬實力稽查隨時  
隨事整頓釐剔有應酌辦具奏事件再行分晰據  
實奏

聞以仰副

皇上諄切訓勉之至意奏入

上諭該部知之

同日阿桂福康安又奏言現在各路官兵俱已撤  
回解送賊匪業經陸續審辦甘省實無必需臣阿  
桂在此辦理之事是以發摺後臣阿桂即自固原  
起程馳赴

行在復

命叩謝

天恩臣福康安由鹽茶靖遠一帶巡查進至蘭州省城

奏入報

聞

福康安又奏言通渭縣城前被逆回攻破將獄中  
絞犯三名放走內有孫雙勞子一犯旋即自行投  
回經前督臣李侍堯

奏蒙

諭旨以該犯尚屬畏法寬減發落在案臣于六月二十  
七日在石峯堡軍營有該縣絞犯包發林馮朝仁  
同禁卒李子義赴營投首臣飭交陞任臬司陳步  
瀛嚴加審訊據該司稟稱提犯訊供包發林馮朝  
仁被賊放出後即同禁卒李子義在通渭南山躲  
藏不敢進城旋于包家山路遇賊匪該犯等被脅  
不從包發林左臂受有矛傷一處又跌傷左腿不能  
行走該犯等即在包家山潛住迨大兵齊集石峯

堡遂赴大營投首並無潛逃從賊情事質之禁卒  
李子義供亦相符臣覆訊無異查該二犯並未潛  
逃從賊其投首較遲尚屬有因可否將包發林馮  
朝仁二犯即照先經投首之孫雙勞子一體減為  
杖一百流三千里恭候

欽定再查該縣城破時尚有軍流人犯二十名同時逃  
散旋于十三日即有王愛李六免張牛子陳復初  
楊發勝張二觀周二朱大有鮑發連范良魏廷體



裴保等十二犯在秦安伏羗投首復于十四日有  
畢進賢馬好義谷二小等三犯在清水隴西投首  
伏查該犯等初因惶懼奔逃旋赴隣封投首距失  
事之期不過兩三日亦尚屬畏法自應推廣

皇仁將王愛等十五犯各照軍流本罪減等以示勸獎  
奏入

上諭該部知之

同日阿桂福康安奏言七月十三日據防守安定

之洮岷協副將趙繼鼎稟稱馬家河地方聞有賊  
匪竄匿空堡外委趙宗先不能搜捕即帶兵前往  
擒拏賊匪等撲出抵拒經官兵殺死六名餘賊四  
散逃逸隨入堡內將男婦大小一百餘名悉行殲  
戮復追至馬家寨關道溝等處殺死男婦五十餘  
名至高家灣地方又遇賊百十餘人抵拒官兵傷  
斃外委趙宗先及兵丁數名經官兵勦殺多人餘仍  
奔逸請飭發兵追勦等語臣等隨派侍衛額爾

登保副將和倫帶兵馳往該處督同搜捕並令將  
此項賊匪究從何處竄匿人數若干之處會同安  
定縣詳查據實稟報嗣經該侍衛等稟稱賊匪由  
高家灣分竄昌家岔青風山個家岔劉家店等處  
共五十餘人隨派兵分路截拏陸續經官兵及縣  
役鄉保等擒獲二十八名訊據獲犯供出被官兵  
殺死及自縊者九名又據金縣水家坡花子寨鄉  
保等拏獲賊匪十一名搜獲賊屍三軀俱經該處

地保鄉約查驗委係馬家河回匪查馬家河逃竄  
逸匪共五十餘前後擒拏殲斃已有此數除額爾  
登保先經臣等調令回京和倫所帶兵丁已飭  
令各回本汛所有此項賊匪據安定縣知縣提犯  
究訊並據和倫查報緣馬家河地方回民共七十  
餘戶五月內被海城回犯李可魁裹去數十人該  
縣查明登記檔案至七月初間有陸續逃回者業  
經縣役鄉保拏獲七名尚有未獲十餘人值該縣

隨同原任提兵許世亨往官川搜獲賊犯隨令在  
城防守之高古營外委趙宗先前往搜捕賊匪等  
聞信欲逃被該處地保攔阻當將地保三人殺害  
該外委聲言欲將該處盡行勦洗賊匪等遂逼脅  
未經從賊回民男婦大小一百餘人齊上空堡以  
為抵禦之計該外委所帶兵丁五十人不能搜捕  
趙繼鼎隨帶兵前赴該處擒拿賊匪撲出抵拒經  
官兵殺傷數人餘即分投逃竄該副將隨將堡內

男婦百餘人盡行殺死并跟踪追捕凡遇道途奔竄密洞藏匿同民即行擒戮至高家灣地方被賊傷斃外委趙宗先及兵丁數名該副將隨具文告急旋經和倫等帶兵前來始將逃匿賊匪陸續搜捕其實馬家河逃回之賊止二十餘人該副將所殺男婦二百餘人並非全係賊犯等語查副將趙繼鼎派往防守安定既聞馬家河有竄匿賊匪帶兵前往搜捕並不能妥速查辦轉將無辜之人多

行職戮以致弁兵被害復張大其事稟請添兵追和倫等至彼始將賊匪擒獲是該副將種種辦理不善怯懦無能實屬罪無可諉應請

旨將兆岷協副將趙繼鼎革職發往伊犁効力贖罪其外委趙宗先于搜捕時聲稱勦洗以致賊匪逼脅良回入堡抵拒該外委被賊殺死毋庸議卹至所帶兵丁係聽從該外委指使致有傷亡究屬因公亦堪矜憫所有該兵丁等應得卹賞銀兩應着落

趙繼鼎名下追給奏入

上諭內閣曰阿桂福康安叅奏洮岷協副將趙繼鼎擒  
賊回民男婦二百餘人並非全係賊犯請將趙繼鼎  
發往伊犁効力贖罪所擬殊失之輕縱趙繼鼎為副  
將大員帶兵搜捕餘賊凡遇有擒獲之人即當詳悉  
訊明如實係從賊匪徒應行正法即有狡供者亦當  
解該督詳審方為無枉無縱豈得不問是賊與否遇  
有回民即行擒戮以致無辜被其戕害者二百餘人



實出情理之外阿桂等僅擬發往伊犁未為允協趙繼鼎竟定為斬監候秋後處決餘著核擬具奏

同日阿桂福康安又奏言查固原州回匪馬昇貴馬漢龍于靠城屋內挖有地窖一案前經督臣李侍堯飭委平慶道沈鳴臯提犯究訊嗣據該道錄供詳報臣福康安因供詞未確曾將大概緣由具奏奉

硃批是秉公為之欽此臣等前于提督問正祥提兵三

德帶兵往固原一帶搜查餘匪之便諭令順道先  
往查勘並密加體訪據該提督等親往履勘並繪  
送地窖圖樣查對地方官所繪原圖丈尺稍有不  
符並據該提督等稱此事固原州回漢民人俱有  
議論稱地方官所報不實茲臣等于初八日同至  
固原先往南關外馬昇貴住居駱駝廠所挖地窖  
內詳加履勘向北挖長一丈八尺寬八尺三寸有  
槽道二處又轉向西挖長七尺六寸寬一丈五尺

有槽道一處窖內俱深七尺臣等伏思州城在北  
何以地窖轉向西挖詢問其故則因馬昇貴所居  
貼近城壕若向北進挖則入壕內且向北窖內土  
色陳舊槽道處有蹄齧痕迹甚多係收養牲畜者  
旁有積土亦係遠年堅實臣等查勘畢復至闕廂  
內伊子馬漢龍所住房逐細履勘相去約有二  
里其前院西邊有舊井一口後院東邊即新挖土  
井口寬二尺望不見底以繩試探深有五丈查馬漢

龍住房雖與伊父隔一道城然尚係闕廟俱在大城之外毋論父子住居相隔三百一十餘丈中有海壕及民房街道挖至二里勢必不能且馬昇貴所開地窖深止七尺如果伊父子內外暗通約會開挖亦應相仿何至挖深五丈而五丈餘深之地應何從施工又何處出土況馬漢龍即欲開通至伊父所挖土窖亦應于前院刨掘稍近數丈豈有于後院施工轉從自己住房下挖地道之理種

種情節揆之事理皆所必無但馬昇貴家何以有  
此地害臣等詢訪居民則僉稱該處風俗多有開  
挖地窖以為藏放糧食畜養牲口處所既圖省  
便且冬暖夏涼因歷舉曰民馬照漢民王元張純  
張祿李文喜家內各有地窖且一家內或有兩三  
處臣等復往逐一履勘其寬深丈尺亦有與馬昇  
貴家約畧相同者隨提馬昇貴等嚴加審訊據馬  
昇貴供那廠裡地窖原是乾隆四十三年挖了捨

駐口的現有槽道今年要添一道槽又叫女壻王舍而巴同雇工馬天才等又往西挖深丈許本年四月田五造反有馬果能在靜寧州供出我與田五往來拏去審問本州來家踏勘見了地窖就夾訊女壻王舍而巴他怕受刑就混供是挖的攻城地道其實地窖離海壕不遠若向北進挖即入壕內豈不被人看見况我兒子住在關廟裡面尚有

大城就挖通也是無益那田五我原認識今年閏

三月十七日有個尉阿渾到廠裏說田五要在四  
五月間謀反我聽見害怕即忙打發他起身這話  
也曾告訴過兒子馬漢龍實沒有通同謀逆情事  
但我知道田五謀反不先出首就是重罪了馬漢  
龍供我住房前院有口舊井因下口被水刷大恐  
要坍塌在後院另挖一口新井挖至五丈尚未見  
水也就不挖了這五丈深的井底如何容得人在  
裏頭打地道况離父親住處有二里路如何能挖

得通等語查馬昇貴父子雖訊明無蓄謀為匪內  
外暗通開挖地道情事但素與田五往來即非善  
類且本年閏三月尉阿渾告知田五要造反該犯  
轉告伊子其壻亦在旁與聞並不到官首明其心  
懷觀望尤為可惡查律載凡謀反大逆知情故縱  
隱藏者斬應將馬昇貴馬漢龍王舍而巴俱照律  
擬斬立決馬昇貴次子馬三斤子及伊孫馬如林  
馬如海馬如昌馬友雖堅供並不知情亦未便寬



縱應發遣極邊煙瘴充軍至固原州知州王琮雖  
非失察開挖地道但馬昇貴與田五往來係署靜  
寧州知州徐躍龍審出關提始行查拏審問並非  
伊首先訪聞已難辭失察之咎且固原城內外回  
漢民房有地害者居多該牧身為地方官風土情  
形豈竟茫然不知乃以馬昇貴廠內素有之地害  
及馬漢龍新挖之土井遂指為內外暗通以為破  
城之計刑逼妄供張大其詞通行稟報希異邀功

實屬昏憤庸妄應請

旨將固原州知州王琮革職平慶道沈鳴皋承審此案  
未能究出實情已另案革職拏問毋庸置議陞任  
按察使陳步瀛雖屢經委審究明非開挖地道但  
伊曾經屢勘未得實情亦有不合請

旨交部察議其馬昇貴供出之尉阿渾訊係陝西同州  
府人一向在外行醫臣等已行文該處嚴切查拏  
並飭甘省各屬一體實力緝緝俟拏獲後另行究

辦奏入

上諭該部知之

欽定石峯堡紀畧卷十七